

NA AUGUSTUS TA CUMINZA BORA PA ORO

ORANJESTAD (IPA): 11 luna pasa a wordo forma aki na Aruba mes e compania CanArub Gold Development N.V., y te cu awor a wordo aproba pa e gobierno di Aruba cu nan por cuminsa cu e exploracion di 3 aña largo, ya cu dialuna e permiso wordo duna oficialmente.

E exploracion lo wordo haci cu facilidadnan tecnico y bao di direccion di Monte Carlo Gold Mines Ltd., cu ta un compania Canades specializa den mina y nan oficina principal ta na Brampton, Ontario.

Monte Carlo den e siguiente tres añanan lo evalua y despues identifica e areanan unda e permisionan lo cubri cu nan lo bay pidi pa cuminsa cu e exploracion.

Pa cuminsa localiza oro, lo bini Aruba personal y equipo completamente moderno cu lo por detecta oro for di avion.

Monte Carlo ya caba a cuminsa bishita Aruba na October 1986, y durante di nan estadia e tempo ey na Aruba di 28 dia, nan a haci analisis y trabao cu a wordo haci 70 aña pasa. Nan a cu-

bri for di Westpunt te banda di Boca Prins, na e banda no-habita di Aruba.

E investigacionnan di Monte Carlo a conclui cu na dos ocacion oro a wordo saca for di bao di tera, y tambe na e superficie.

E trabao cu a wordo haci na October a confirma tambe e estudionan intensivo haci na Aruba pa un equipo di investigacion di un universidad Canades den e decada di 1940, cual descubrimiento a intrigua e fundadornan di CanArub. E estudionan "antiguo" a revela e contenido di oro entre 0.2

ons pa ton te cu 9.0 ons pa ton.

Como resultado, Monte Carlo a drenta den un acuerdo cu CanArub aña pasa pa habri investigacionnan costoso mas avanza pa haya sa cuanto ton tin, y di cua grado.

E programa tabata pendiente di un peticion cu CanArub a haci ariba e gobierno di Aruba, y cu awor permiso a wordo duna.

E presidente/fundador di Monte Carlo, cu actualmente ta na Aruba, lo regresa Ontario fin di e siman aki pa haci preparacionnan pa un exploracion inicial di 2.500.000 dollar cu lo cuminsa na final di Februari.

Plannan ta pa cuminsa cu un estudio geofisico di Aruba cu lo wordo haci for di avionnan di Terraquest Ltd., cu ta un compania Canades cu tin avionnan sumamente sofisticada y cu hopi experiencia den estudio di oro.

Nan lo bula ariba Aruba for di noord-oost pa zuid-west, y tambe for di oost pa west, pa identifica cualkier area unda cu metalnan precioso ta wordo forma, y tambe unda nan a wordo forma den pasado. Nan lo busca tambe pa basen di metal grandi, e.o. cooper, zink, nikkel).

E estudio via aire lo por localiza tambe via-nan di awa cu ta bao di tera, y cu por wordo usa.

E desicion pa haci e investigacion costoso aki a bin pa e presidente di Mon-

te Carlo, señor Gordon Leliever, kende a bisa cu e mes personalmente a observa cu Aruba tin na hopi lugar coper di grado hopi halto, cu generalmente no ta conoci na otro partinan na mundo den cantidadnan asina grandi. Na Aruba coper ta hopi prevalente.

E presidente a bisa cu produccion normal di coper ta entre 0.5 y 3.0 porciento na otro partinan di mundo, pero na Aruba tin un exceso di 50 porciento.

Tambe a wordo observa cu den cadushinan na diferente lugar tin un abundancia di "azurite" y "malachite". E azurite ta di color licht-blauw y e color di malachite ta berde.

Lo establece un laboratorio di estudio na Aruba cu por haci 100 estudio pa dia. Un equipo di cuatro geologo di Monte Carlo for di Canada, lo biba na Aruba trahando 6 dia pa siman pa localiza ariba e mapanan e ocurencianan bieuw di oro na Aruba. Nan lo identifica e estudio di electromagnetico y esun di magnetometer.

Banda di Augustus, bastante investigacion y estudio lo a wordo haci caba y nan lo cuminsa cu e programa di boramento, y prome cu e boramento aki cuminsa, nan lo bay haci investigacion centimeter pa centimeter prome.

E homber cu a haci tur esaki posibel ta e presidente di Monte Carlo, esta Gordon Leliever. Su compania tin bastante mina di oro na Canada.